

13
DISPUTATIO JURIDICA ORDINARIA
DE
PROBATIONE CRIMINIS MAGIÆ,

Quam,

Sub PRÆSIDIO

D. JOHANNIS SCHACKII,

Profess. Publ. Ordin., & Consistorii Regii
Assessoris,

die 19. Junii, Anno 1706.

In Auditorio Majori

publicè defendet

MARTINUS von Norimann/

Eqves Rugianus.

GRYPHISWALDIÆ,

TYPIS DANIELIS BENJAMINIS STARCKII,
REG. ACADEM. TYPOGR.

Inclyto

Eqvestri Ordini Rugiano,

VIRIS

Illustris, Generosissimis & Maxime

Strenuis,

Dnn. Equitibus Rugianis,

Patronis & Evergetis suis
summopere colendis,

hanc Disputationem,

tanquam primitias studiorum suorum Academicorum,

cum voto omnigenae felicitatis

offerre voluit

RESPONDENS.

DISPUTATIO JURIDICA ORDINARIA
DE
PROBATIONE CRIMINIS
MAGIÆ.

CAP. I.

Tractans vocabula Tituli nostri.

§. I.

Probatio in genere significat asserti confirmationem. In specie verò ad facta civilia controversa refertur: & quidem, si in Judicio fiat, describi potest probatio; quod sit actus judicialis, quo per idonea argumenta de facto aliquo, de quo in Judicio controversa est, Judici fit fides. Peretz. in tit. C. de probat. n. 2. Umm. disp. 15. tb. 1. n. 3.

§. II.

Probatio vel plena est; vel *semitplena*. Plena probatio illa vocatur, quæ Judici tantam fidem facit, quanta ad finiendam controversiam sufficit. Mascard. vol. 1. qv. 4. n. 15. Hujus species Dd. ponunt, testes, scripturam, Confessionem, evidentiam facti, Juramentum, presumptionem justam, famam. Vid. Mascard. vol. 1. qv. 4. n. 16. Umm. disp. 15. tb. 1. n. 5. Semiplena probatio illa est, per quam rei gestæ fides aliqua fit Judici, non tamen tanta, ut jure eam debeat sequi in sententia dicenda. Quò referunt unum testem, privatam scripturam, presumptionem non ita urgentem. An autem in crimine magiæ probando,

bando, plena vel minus plena probatio haberi possit; de eo in sequentibus agendum erit.

§. III.

Crimen Magiæ refertur inter crimina publica, in quibus puniendis damnum, quod per illa Reipublicæ illatum, vindicatur; & ut hoc vindicetur, ordinariæ & certæ criminales pœnæ legibus publicorum Judiciorum statutæ sunt. *l. 1. ff. d. publ. jud. l. 3. §. fin. ff. d. prevar.* Dicuntur autem hæc crimina, publica, ratione *cause efficientis & finis* à certis quibusdam legibus, per quas referuntur inter judicia publica, quorum persecutio est cujuslibet. Sunt porro vel *capitalia*, vel non *capitalia*. Capitalia in lata significatione sunt, quibus est pœna capitis naturalis vel civilis. *l. 103. ff. d. V. S. §. 2. Inst. d. publ. Judic.* in stricta verò significatione, κατ' ἐξοχήν, quibus est mortis pœna, seu sanguinis. *l. fin. C. d. bon. proscr. l. 4. C. d. pœn. l. 1. ff. d. effract.* Sunt & aliæ criminum distinctiones, quas studiosè omittimus, ne prolixi esse videamur. Dantur enim *extraordinaria*, *atrocia*, *atrocissima* & *pernoctata*, de quibus aliò locò & tempore plura dicenda sunt.

§. IV.

Vox *Magia* in genere idem est quod maleficium, sortilegium & veneficium, & *est tale crimen, quo quis adhibitis illicitis artibus, diabolo cooperante, hominibus eorumve bonis nocet, illos deludit, & miraculosa facere conatur, aut divinandi curiositatem profitetur.* *l. 4. l. 5. l. 6. C. de malefic. & mathem. ad t. t. X. d. frigid. & malef. c. 1. & 2. X. d. Sortibus.* Magiæ nomen olim honorificè usurpatum fuit, & solis sacerdotibus tributum. Vid. *Osiand. de Magia, thes. 1. §. 4. Gædelm. d. mag.*

mag. lib. 1. c. 2. 3. quoniam olim magiæ vocabulum denotavit quancumque scientiam occultam, Thomas, de Crim. Mag. §. 9.

§. V.

Hoc magiæ crimen duplex est. Vel enim est *expressum* pactum, cum diabolo initum, quo quis DEUM abnegavit, & diabolo se mancipavit. Vel est *tacitum* pactum, quando quis citra peculiare sive expressum fœdus, diaboli utitur ope & auxilio: idque iterum tripliciter contingit, (1) si quis commercium cum ipso dæmone habendo & artes diabolicas exercendo nocet, (2) si quis ejusmodi artibus non nocet. (3) Si quis superstitiosis remediis utitur. *Carpz. qu. 49. & seq. Struv. exercit. 49. Th. 60. & seq.*

CAP. II.

De

Probatione Criminis Magiæ.

§. I.

ANtequam ad ipsum hujus criminis probationem procedamus, non immerito quæritur; *an detur tale crimen magiæ sive veneficii?* Nam per veneficium non modò illud crimen hic intelligimus, cum quis venenò occidit; sed & si quis sacra impia nocturnave incantandi & interficiendi causa peragat. *Vid. Anton. Matthai in comment. ad tit. dig. 47. & 48. pag. m. 504. l. 13. ff. ad L. Cornel. de sicar. & venefic. Et respondemus, quod detur magia. Vid. Exod. Cap. 20. v. 6. Deuter. Cap. 18. v. 10. Licet Johannes Wierus, Medicus, in suo tractatu de præstigiis demonum, docuerit, quod non*

detur crimen Magiæ dæmoniacæ, prout vulgò concipitur : & in appendice variis apologiis adversus varios censores hanc ipsam sententiam suam defendere satagit. Scripsit quoque *Gabriel Naudæus* apologiam pro iis, qui vulgò magiæ accusati sunt ; & multa erudita suppeditavit argumenta, oppugnandi sententiam communem. Ex ipsis scriptoribus Pontificiis modernis *Malebranchius lib. 2. C. ult. d. inquir. veritate*, in sententiam eorum inclinatur, qui imaginationi historias magicas adscribunt. Præ reliquis notus est. *Antonius Van Dabie*, Medicus Belgicus, Cujus dissertationes *de oraculis, item de origine & progressu idololatriæ & superstitionum, de vera ac falsa prophetia, & de divinationibus idololatricis Judæorum*, multi æstimant, dicentes quod majori cum apparatu multos communes errores de diabolo ejusque effectibus revelaverit. Ex hoc laudato Medico, *Balthasar Beckerus*, Theologus Belgicus, quàm plurima, quæ in Tractatu de *mundo fascinato* prodidit, hausisse videtur. Enimverò cum *Balthasar Beckerus* diaboli vim omnem externam in homines, ac prope ipsam substantiam ejus apertè negaret, non potuit non adversariis suis multa contra se arma suppeditare. *Vid. Thom. Thes. inaug. d. crim. mag. §. 3.*

§. II.

Ipse celeberrimus *Dn. Thomasius* de Magia ita docet, quod quidem detur diabolus extra hominem; ipsumque ab *extra, intrinsecè* tamen & *invisibiliter* operari in hominibus improbis ; sed negat, dari sagas & magos, pacta cum diabolo ineuntes ; quin potius arbitrat, bitratur,

bitratur, hanc fabulam ex Judaismo, Gentilismo ac Papismo conflata esse, & iniquissimo processu hactenus etiam apud Protestantes usitatissimo, stabilitam. Hæc verò sententia in suis verbis se ipsam refutat: dum enim conceditur, diabolum *ab extra, intrinsecè* tamen & *invisibiliter* operari in hominibus improbis, per consequentiam affirmatur, quod *ab extra* in assumpta forma cum illis agat, & quod dentur sagæ & magi pacta cum diabolo ineuntes, *Thom. d. 1. §. 6.*

§. III.

Disputat porro *Dominus Thomafius d. 1. §. 14. & seqq. contra Carpozovium*, quod non detur magia; & quidem ad (1) argumentum *Carpozovii*, dicentis, quod Jure divino magi debeant interfici, ita respondet; magos ibidem non puniri propter pactum cum diabolo; sed propter idololatriam. Verum hæc responsio ideo non valet, quia potius dicendum est, quod magi ibidem puniti fuerint ob pactum cum diabolo, & simul ob idololatriam; siquidem & hoc pactum inducat idololatriam. (2) urget *Carpozov. Cap. 7. Exodi*, ubi Pharaonis magi pro talibus habentur, qui veris præstigiis alios offendunt. Ad hoc fundamentum respondet *Dominus Thomafius*, quod magi Pharaonis, dum quibuscumque præstigiis usi fuerint, nihil fecerint ex pacto cum diabolo; & quod non tam ob istas præstigias, quàm ob superstitionem idololatricam iussi fuerint à DEO interfici. Sed, nec hæc responsio *Dn. Carpozovium* ferit, cum eo ipso, quod magi interfecti fuerint ob superstitionem idololatricam, simul ob istas præstigias capitalem luerint pœnam. *Levit. XX. 27.*

(3) Dicit *Dn. Carpozov.* quod detur magia; quando nimirum vult; hoc apparere ex sanctionibus Ethnicorum, pœnas capitales in magos decernentium. Putat ibidem *Dn. Thomafius*, confundere *Dn. Carpozovium* quæstionem de existentia magorum cum diabolo paciscentium, cum quæstione de pœna magiæ naturalis & artificialis. Sed non video hanc confusionem, cum negari nequeat, Ethnicorum moratiorum rationem tam rectam fuisse, ut magiæ naturali nullam capitalem pœnam dictaverint; sed potius illicitæ & dæmoniacæ. Neque porro insimulandus est *Dn. Carpozov.* alicujus confusionis, quod scil. hoc suo asserto legem naturæ cum moribus quarundam gentium confuderit; siquidem, quando ad sanctiones Ethnicorum provocat, simul ad mores gentium respicit, qui legem naturæ pro fundamento agnoscunt. (4) Utitur *Dn. Carpozov.* argumento ex *Jure civili* sumpto, quando scil. argumentatur à veneficis ad sagas; ad quod ita respondet *Dn. Thomafius*, quod à veneficis ad sagas non detur consequentia; sed hæc responsio directo stat contra *l. 13. ff. ad L. Cornel. d. Sicarius & venefic.* ubi per veneficum non solum illum intelligimus, qui veneno occidit; sed &, qui magiam dæmoniacam exercet. (5) *Dn. Thomafius* reprehendit *Dn. Carpozovium*, quod provocaverit ad testimonium scriptorum Pontificiorum; sed non potuit ignotum esse *Dn. Thomasio*, quod JCTi in probandis suis hypothefibus, vel ad ipsum Juris textum, si haberi possit, vel ad celebriores Dd. ex legibus doctè argumentantes confugiant; siue illi Doctores sint Pontificii, siue non. (6) Obji-

Objicitur *Dn. Carpzovio*, quod doceat; quosdam magos tacitum cum Diabolo habere pactum; quod ipsum *Dn. Thomafius* sine censura non dimittit, dum negat, homines commercium corporale cum diabolo habere, & ita tacite DEO renunciare posse. Sed ipse *Thomafius d. l. §. 12.* confitetur, quod diabolus cum homine in corporali specie pactum inire possit; hinc quoque concedere debet, quod homo corporale commercium cum diabolo in assumpto corpore habere possit, & ita tacite DEO renunciare. (7) Dicitur à *Dn. Thomasio*, quod *Dn. Carpzovius* malè inferat à pœna homicidarum & adulterorum ad pœnam Sagarum. Enimverò, quis magis homicidia perpetrat, quàm magus, qui sæpius ope diaboli non unum; sed plures homines occidit; quinimò quis magis pro adultero habendus, quàm magus, qui sæpius confitetur, se cum diabolo in assumpto suo corpore rem habuisse; licet non negandum sit, quod hoc ipso homines illudantur, quorum tamen malignum propositum hoc ipso non corrigitur. (8) Multæ inconvenientiæ *Dn. Carpzovio* affinguntur à *Dn. Thomasio*, ex hoc, quod ille putaverit, expedire sagis ipsis, ut quàm citissimè morte puniantur. Nam ad hoc respondetur; non esse mentem *Dn. Carpzov.* ut carnificem pro instrumento ordinario conversionis habere velit, sed id tantummodò innuere vult, quod plerumque experientia teste, sagæ & magi non prius à pactis suis cum diabolo initis discedere soleant, quàm cum pœnam capitalem subire necesse habent. (9) Vult *Dn. Thomafius d. l.* non quidem in specie contra *Carpzovium*; sed

sed in genere crimen magiæ ex hoc principio abnegare, quod diabolus non possit assumere corpus; sed respondemus, quod diabolus ut spiritus non quidem habeat carnem & ossa; exinde autem non sequitur, quod non possit assumere corpus: nam & hodierni Theologi contra *Beckerum* ex textus circumstantiis strenuè defendunt, quod diabolus CHRISTUM in assumpto corpore tentaverit. Vid. *D. Grapii Diss. de Tent. Eva & CHRISTI à Diabolo in assumpto corpore facta, Cap. II. per tot.* (10) Cbnegat *Dn. Thomafius* crimen magiæ ex hac ratione; quia Diabolus non potest turbare potentiam naturæ invisibilis; sed respondetur, quod neque visibilem, neque invisibilem naturam turbet, si in assumpto corpore pactum cum suis assclis ineat. (11) Affert *Dn. Thomafius* contra magiam hanc rationem, quod dicat, diabolum esse tam impotentem spiritum, ut possit crepitu ventris ejici; sed, hæc ratio magis ridicula est, quam ut sit alicujus ponderis. (12) Putat *Dn. Thomafius*, quod neque ex parte hominum, neque ex parte diaboli, ullus effectus ant ullus usus fœderis sit diaboli cum hominibus; sed respondetur, quod ex parte diaboli hic effectus sit, ut illudat, & damnum det hominibus; ex parte verò hominum, ut pecuniæ, avaritiæ & ambitionis eò meliores fructus habeant. (13) Rejicit *Dn. Thomafius* crimen magiæ; quod leges civiles nihil de pacto diaboli cum hominibus, memorent; sed remittitur ad *l. 4. C. d. malefic. & mathem.* ubi dicitur, quod magia severissimis legibus vindicanda sit. Nec obstat, quod Imperator in sequentibus hujus legis

verbis

See pp. 8-26 see beyond the next three leaves.

verbis illas artes magicas approbet, quibus homines quidam, boni alicujus causa, v. gr. ob sanitatem, vel propter ubertatem fructuum, utuntur; siquidem hæc verba vel de magia naturali; vel de lustrationibus agrorum, quæ cum publice decantatis litaniis fiebant; vel de solemnibus processionibus intelligenda sint. Vid. *Brunn. ad b. l.* (14) refert *Dn. Thomasius*, quod nunquam verum corpus delicti in crimine magiæ adfuerit. Id quoque à nobis dicitur, siquidem illud frustra in hoc crimine occulto requiratur per tradita. *Farinacii qv. 2. Boceri Cap. 3. n. 4. Tabor vol. 2. pag. m. 404.* Interim tamen confitendum est cum *Dn. Carpzovio*, *qv. 119. n. 61.* quod in delictis occultis, & facti transeuntis, ad quæ pertinet magia, de corpore delicti non aliter constare possit, quam per conjecturas & indicia; ideoque in his, scil. delictis occultis, præsumptionem & conjecturalem probationem communiter haberi pro plena & concludenti; (15) docet *Dn. Thomasius d. l.* quod crimen magiæ ad fabulas pertineat, quibus Clerus Pontificius decipere solet laicos incautos; sed primum negamus, postremum largiri volumus. (16) Sunt autem præter *Dn. Thomasius* & alii, qui jam ante ipsum de sagis & magis dubitasse feruntur: Nimirum, *Franciscus Ponzinibius*, *JCtus Italus*, tum & *Wierus in tract. de prestig. demonum*, & *Reginaldus Scotus*, Nobilis Anglus, in libro lingua vernacula edito, sub titulo *detectionis artis magicæ*. Tandem *Balthasar Beckerus*, Theologus Amstelodamensis, Vir in Philosophia corpusculari & mechanica, tum & in mathesi versatissimus, non solum ex principiis, quibus imbutus est; sed & ex sacra Scriptura defendere

dere contendit, non versari diabolium in his terris, & pactum cum ipso, esse mera ludibria phantasiæ, aut figmentum malitiæ; spectra in papatu excogitata fuisse ad purgatorii ignes calefaciendos & sacculos sacerdotum augendos. Hic liber Balthasaris Beckeri, qui inscribitur *mundus fascinatus*, cum applausu, uti fieri solet, in defensione paradoxorum exceptus est; sed putant, hunc doctissimum Virum ex principiis suæ philosophiæ, quam excoluit, in devia abreptum fuisse, ita, ut cum abusum, nimiam superstitionem & credulitatem taxare debuerit, omnem maluerit rem auferre. Inde tot contradicentes expertus est, inter quos sunt *P. Poirettus, Jean van de Weyen / Andr. Beverland, Glanvill. in Sadduceism. triumph. & plures alii.* De *Wiero*, cujus supra mentionem fecimus, sciendum, (17) quod ipsemet *Wierus*, ex cujus libris de præstigiis, celeberrimus *Dn. Thomasius* omnes ferme rationes suas pro stabilienda sententia sua contra existentiam magiæ mutuatus est, in suspicionem magiæ trahendus sit: quemadmodum id ipsum à *Tabore in vol. 2. pag. m. 458. n. 40.* sex argumentis evincitur. Inter alia, notanda illa sunt, quæ *Tbuanus lib. 89. histor. p. 174. Anno 1588. de hoc Wiero*, nobis reliquit. *Johannes Wierus, Nobili Zelandiæ inundata familiâ ortus, philosophicis studiis egregiè à pueritia instructus, Heinrico Cornelio Agrippa, homini cum primis erudito, & magicis superstitionibus infami, ante 50. annos Gratianopoli apud nos defuncto, operam in pueritia navavit.* Voluit quidem Cornelium Agrippam à suspicionem criminis magiæ liberare, in *lib. 2. de prestig. cap. 5.* sed talibus potius argumentis, quæ ipsum *Wierum, Agrippæ*

Agrippæ hujus discipulum in eandem suspensionem trahunt. Vid. *Tabor. Vol. 2. pag. m. 458.* Quinimò sub prætextu relationis & specie detestantis, non tantum *lib. 5. & passim*; sed etiam in libello particulari *de Pseudomonarchia Daemonum*, formulas invocandi, & conjurandi familiares spiritus sive diabolos, formaliter docet, ut ita multa magiæ indicia; imprimis autem primum, tertium & quartum *Constitut. Carolin. Artic. 44.* in ipsum quadrent. De *Reginaldo*, sive *Reinaldo*, *Scoto*, de quo supra quoque diximus, & hoc (18) notandum est, quod magiam diabolicam ex hac ratione (1) negaverit, quod DEI opera impiè diabolo ab illis tribuantur, qui lamias esse, statuunt; sed, quod hoc falsissimum sit, ostenditur apud *Delrionem in disquis. magic. lib. 2. q. 11. & Voët. disput. d. natur. & oper. Daemon. p. 696.* siquidem ad sagas, ut tempestates excitent, aut productas agitent, non confugiamus; neque opera DEI illis, aut diabolo tribuamus, quando asserimus, quod ope diaboli tale quid excitare possint. (2) Dicit *Rainoldus*, quod nec in veteri, nec in novo testamento sagarum mentio fiat; nec ullus à saga læsus, à Christo restitutus sit. Quod autem ad vetus testamentum attinet, contrarium contra *Reinaldum* evincunt illi, qui sunt peritissimi hebraicæ lingvæ. Ad alteram autem objectionem ita respondetur, quod nec podagricum, nec colicum, speciatim & explicatè à CHRISTO sanatum esse, legamus; inde tamen non conficitur, quod non dentur homines, his morbis laborantes. (3) Statuit *Reinaldus*, quod diabolus cum sagis pacisci non possit, quia non habet corpus; sed respondetur, quod

DEUS dicatur cum homine pacisci; exinde autem non sequitur, quod ex parte utriusque paciscentis corpus adesse debeat. Deinde potest diabolus ex assumpto corpore jam composito cum sagis pacisci. Vid. *Mauritii disertat. pag. m. 1073. & 1087. & Hermannii Gæhausens, Professoris Rimbelenfis proc. Juridic. contra sagas, qv. 3.* (19) Prodit quoque in hanc scenam D. Cyprianus Regnerus in *censura belgica Instit. Juris ad §. 5. Inst. d. publ. Judic. pag. 690.* ubi per auctoritatem *Vinnii & Tholosani*, apud Belgas incertum esse, scribit; *an magi vel saga dentur?* Verum hoc dogma à Belgis quibusdam ex libro *Reginaldi Scoti*, Angli, & athei haustum est; quod tamen ipse Rex Angliæ, *Jacobus 1.* & ex Theologis Anglicanis *Johannes Reynoldus*, atque *Gvilielmus Perkinsus* solide refutarunt, & seriò indoluerunt, non ex Anglis tantum; sed & ex Belgis complures, à pestilento hoc libro infectos, jam, more Saducæorum, de ipsis quoque diabolis dubitare, prouti ingenuè profitetur doctissimus *Gisebertus Voëtius, pag. 3. select. disput. pag. 565.* qui multis Scripturæ sacræ locis impiæ hujus sententiæ immanitatem redarguit, & Belgarum quorundam affectatam ignorantiam hac in parte detestatus est. Vid. *Tabor. Vol. 2. pag. m. 532.* conferatur illud exemplum, quod *Anno 1535.* contigit, ubi *Cherubinus de Serafinis*, Sacerdos ordinis Minoritarum seu Francisci, cum sociis fœdus cum diabolo iniit, de necando Pontifice, tum sedente, per imaginem ipsi corformem, & sufficiendo *Asculano* in ejusdem locum. Quasi in potestate diaboli esset, Papas deponere & imponere sedi petrinæ seu vaticanæ. Vid. *Theatr. Europ. d. Anno 1635.*

1635. pag. m. 387. Sed mittimus (20) sententias eorum, qui nullam magiam statuunt, & concludimus, quod ex Gallia *Bodinus de demonologia*, ex Anglia, ipse Rex *Jacobus I.* ex Belgio, *Delrio*, ex Germanis, *Godelmannus*, *Thummius*, *Crusius*, *Fridericus Mindanus*, aliique ex specialibus suis Tractatibus notissimi sint, qui communem opinionem de sagarum existentia defenderunt. Cum autem in præcedentibus, & quidem n. 15. concesserimus, quod Clerus Pontificius crimine magiæ incautos laicos decipere soleat; hinc non peccabimus, si hic addamus, quod multi clerici se hoc crimine contaminaverint. Etenim statim post tria secula à morte Salvatoris nostri, magia ingentia cœperit incrementa, ita, ut *Baronius* ipse in Anno CHRISTI 392. §. 22. fateatur, Clerum Pontificium hac quoque labe magiæ infectam fuisse, & quosdam per signa miraculosa se pro *Elia*, pro *Johanne*, atque etiam pro *Christo*, gessisse, variisque incantationibus ad dementandum populum usos fuisse. Unde Imperatores coacti fuerunt, capitali pœna in ejusmodi maleficos animadvertere, prout ex *Ammiano Marcellino lib. 39. Socrate lib. 4. c. 15. Nicephoro lib. 10. c. 44. & 45.* imò ex ipsa eorum temporum legislatione constat, nempe l. 4. & seq. C. d. *malefic. & mathematic.* ubi malefici ἐχθροὶ καὶ ob sceleris magnitudinem ita dicti sunt. l. 5. C. h. i. Quinimò *Genebrardus lib. 4. Chronolog. ad Annum 902. pag. 807.* in exemplaribus nondum corruptis tradidisse legitur, Petri cathedram, si quæ usquam ejus generis fuerit, per 50. Papas à *Johanne 9.* qui sub initium seculi X. vixit, ad *Leonem* usque, per annos 150. magia dæmoniaca

foedatam fuisse. Quod alii sic explicant. Pontifices à Sylvestro 11. qvi Anno Christi 999. rebus præfuit, ac ut Platina pag. 152. refert, diabolo se totum tradidit, ad Gregorium VII. usque, qvi sellam Anno 1073. occupavit, magos fuisse. Vid. Wolfius cent. 15. pag. 988. Et sic Ecclesia Romana per annos 175. à magis Clericis gubernata fuit. Vid. Tabor Vol. 2. pag. 460.

§. IV.

Describitur autem Magia (scil. dæmoniaca; nam de hac imprimis in hac nostra disputatione) quod sit crimen, quo quis cum diabolo sæpe in corporali specie, vel bestia, vel hominis, vel monstri, comparente, pactum init, quod velit, si diabolus Ipsius voluntati, avaritiæ aut ambitioni satisfaciatur, cum diabolo scortari, in certo loco, ope diaboli per aëra magos vehentis comparere, ac ibi cum aliis similibus diabolum adorare, tripudiare & luxuriari, ope diaboli hominibus, bestiis & frugibus, vel tempestates excitando, vel alio præternaturali modo damna dare, & post certum temporis spatium, anima & Corpore diaboli mancipium esse, ac in æternum manere. Thom. d. l. §. 12.

§. V.

Magia dividitur in naturalem aut artificialem, & dæmoniacam. De hac nobis sermo est, non de illa; quamvis Theophilus Spizelius, qui scripsit tractatum germanicum, cui titulus Die gebrochene Macht der Finsternis / p. 1. c. 1. pag. 8. etiam naturalem magiam ad genera magiæ dæmoniacæ retulerit; licet hoc ipsum simplicitati & pietati hujus viri condonandum esse, cum Thomas. d. l. §. 10. dicamus.

§. VI. Pro-

§. VI.

Probatur crimen magiæ diabolicæ, ex hoc, si quis se obtulerit ad hanc magiam docendam, & simul doctrinam suam in discipulo ad effectum perducatur.

§. VII.

Probatur crimen magiæ, si quis alteri minatus fuerit damnum dare per magiam, & damnum illud insecutum fuerit. Sed, vid. §. 20. ubi asseremus, quod magia non simpliciter probetur per damnum post minas illatum.

§. VIII.

Non quidem probatur crimen magiæ, si quis cum magis & sagis conversetur; attamen se suspectum reddit, cum socius cognoscatur ex socio.

§. IX.

Crimen magiæ non probatur per externæ pietatis signa; sive enim fucatam, sive veram pietatem aliquis confiteatur, non tamen exinde iustum magiæ indicium potest colloqui; aliàs vulgatum illud versiculum;

Omnia cum liceant, non licet esse pium, in usum revocandum esset. Sed multi pii ex hoc fundamento magiæ insimulati fuerunt. Exemplo nobis esse potest *Ludovicus Gotbolfredus*, quem dicunt fuisse virum optimum & valde pium, ac ex sola invidia à Clero per calumniam, ac subornationem falsæ accusatricis fuisse ut magum condemnatum. Fabulam hanc de horrenda magia *Ludovici Gotbolfredi, Franciscus Rossetus*, inseruit Historicis tragicis sui temporis, & inde ex gallico in Germanicum idioma transtulit.

Marti-

Martinus Zeilerus in den traurigen Mord-Geschichten/ 1c.
 Quamvis non negandum sit, quod plerumque mago-
 rum & sagarum hæc sit consuetudo, daß sie unter dem
 Schein der Gottseeligkeit und Heiligkeit allerley Gott-
 losigkeit und böses Wesen / so immer zu erdencken / pfle-
 gen zu verüben. Vid. *Taboris Opera Vol. 2. p. m. 458.*

§. X.

Sola Confessio in hoc crimine non operatur con-
 demnationem. Nam, quando dicitur, quod ex sola
 confessione possit sequi condemnatio, licet processus
 retrò nullus sit; & quod confessio sit sol Judicii; qui-
 nimò quod nemo contravenire possit propriæ confes-
 sioni, tunc hæ Juris regulæ generales intelligendæ
 sunt de objecto civili, non criminali, vid. *Crus. d. indi-
 ciis p. 4. c. 7. n. 26. & seqq.* Vid. quoque §. 26. hujus no-
 stræ disputationis.

§. XI.

Magia non probatur per famam; licet fama o-
 mnia à Dd. notata requisita habeat; quinimò nec
 per se indicium facit, cum, lubrica sit & fallax; sed
 tantum alia indicia concomitando corroborat. Vid.
Artic. 25. Constit. crim. ibique Matth. Stephani.

§. XII.

Magia non probatur per fugam. Hinc rectè
*Carpzov. Qu. 120. n. 168. post Gailium, Zangerum, Coth-
 mannum, Bocerum, & Hippolitum de Marsiliis,* asserit, fu-
 gam sæpius fieri ex justo timore, vel suspicione ve-
 hementi, quod nimirum aliquis in vincula conjicien-
 dus sit, vel alio modo vexationes pati debeat.

§. XIII. Non

§. XIII.

Non probatur magia, si saga in tortura confiteatur, quod viderit aliam sagam auf dem Blocks-Berge. Afferit quidem *Bodinus de demonologia*, lib. 4. c. 2. quod nominatio veneficæ in tortura factæ plenè contra alias sagas probet, ita, ut hæ sine ulteriori inquisitione & tortura ad ignem condemnari possint. Quod simpliciter non admittit *Joh. Zangerus in tract. de tortura* c. 2. n. 194. qui tamen putat, quod ex tali nominatione & confessione contra alias nominatas sagas & lamias possit procedi ad torturam; sed *Berlichius p. 4. concl. 4. n. 113.* ab hac sententia discedit, & distingvit; an saga alias nominet spontè, an verò in tormentis: priori casu esse tantum indicium ad inquisitionem; posteriori verò, ad torturam. Enimverò *Berlichii* sententiam juxta *Artic. 31. constit. crim. Caroli V.* limitamus, si (1) nominatio non fiat ex suggestione, (2) si altera saga possit nominari cum circumstantiis, ubi socia fuerit, (3) si nominatio non fiat ex inimicitia, (4) si nominata aliàs gravata sit. Quod autem saga sagam viderit in monte Brueterorum, vulgò dem Blocks-Berg / hoc putidum est commentum, & simile fabulis Virgilianis de iis, quæ in campis Elysiis geruntur. Vid. *Carpzov. qv. 48. n. 22. 23. Alciat. lib. 8. parerg. cap. 22. Wierus lib. 3. de praestig. demon. c. 11. Dn. Stryk. de Jur. Sens. in procem. n. 62. pag. 20. 21.* qui asserit, quod confessio sagæ, five in, five extra torturam facta; quod scil. hanc vel illam in monte Brueterorum viderit, si alia deficient indicia, non sit sufficiens indicium ad inquisitionem specialem, nedum ad torturam, quia confitens

C

saga

faga non potest rationem sui dicti reddere ex sensu corporeo.

§. XIV.

Magia non probatur, quando faga de alia persona confitetur, quod viderit illam esse mutatam in lupum, canem, vel felem. Nam omnibus ejusmodi testimoniis nulla fides adhibetur, quia misera lamia decipitur glaucomate oculis ipsius objecto à Satana. Vid. *Stryk. de Jure Sens. alleg. loc. n. 52.* Propugnat quidem *Bodinus* has fabulas instar Evangelii, *d. l. lib. 2. c. 6.* ibidemque abutitur historia Uxoris Lothi in statuam salis à DEO conversæ, *Genes. XIX.* sed à potentia DEI, ad potentiam Diaboli, & ab actibus miraculosis ad præstigias dæmonum meris naturæ viribus operantium, non valet consequentia. Nec obstat exemplum Nebuchodonosoris, *Dan. IV.* nam ille nullo modo in bestiam transformatus est; sed juxta mentem Interpretum ita tantum abdicatus fuit ex consortio hominum, ut forma hominis excepta, nihil à brutis animalibus differret quoad conversationem & humanæ societatis appetitum. Hinc melius philosophatur *Augustinus de Civit. DEI, Cap. 18.* credens, nec animam, nec corpus quidem ulla ratione, dæmonum arte, vel potestate in membra, vel lineamenta bestialia veraciter posse converti; sed phantasiâ hominis hîc proram & puppim constituere. Nec prudentioribus Medicis ignotus esse potest morbus ille melancholicus, ab atra fulginosaque bile proficiscens, quem *Lyconthropiam*, sive imaginariam ægri conversionem in lupos vocare solent. Vid. *Pauli Ægineti Instit. medic. lib. 3. c. 6.*

§. XV. Neq̃

§. XV.

Neque probatur magia, si inquisitæ lamiae simpliciter confiteantur, se ipsas cum Satana concubuisse, actusque venereos exercuisse; siquidem talis Confessio pro delira habeatur. *Vid. Disput. D. Kleinii, habitam Roslochii, Anno 1698. die 19. Nov. de lamiarum nefando cum Satana concubitu.* Neque obstat, quod ex quorundam opinione, imprimis *Sulpitii Severi*, angeli cum filiabus hominum concubuerint, & inde Gygantes & potentes in terra nati fuerint; cum ex genuina saniorum Theologorum mente per filios DEI, quorum fit mentio *Genes. VI. 2.* & ad quem locum quoque provocat *Sulpitius Severus*, hic non intelligamus Angelos, sed posteros *Seti*, ab impiis cainitis hactenus separatos, qui conjugia cum filiabus cainiticis ineuntes unâ cum illis pejores facti, tandem excepto ex sethi posteris Noacho, ad unum omnes per diluvium deleti sunt. *Sed vide §. 27. infra*, ubi dicitur, quod lamiae possint cum Satana habere verum concubitum *quoad actum coeundi*; non vero *quoad actum generandi*, & quod in priori casu, si confiteantur concubitum verum cum satana *quoad actum coeundi*, crimen magiæ quibusdam pro probato habeatur.

§. XVI.

Magia non probatur, si in diffamatis ob magiam, stigmata reperiantur. Habent quidem *Crusius de indicis*, p. 2. c. 32. n. 40. *Berlich. p. 4. Concl. 4. n. 154.* *Ostermanus in comment. ad l. stigmata. C. d. fabricens. sect. 8.* talia stigmata pro indicis infallibilis; verum de hoc valde dubitatur, quia medicamentis & aliis remediis caro captivi mortificari potest. *Vid. Zach. quest. medico. legal. lib. 7. tit. 4.*

Qv. 2. n. 15. Et quia carnifices incantatis stylis uti, vel alio modo carnis stuporem inducere possunt. *Vid Oldekopp. tract. contra Carpz. Qv. 10. decad. 3.* Unde satis patet, stigmata per se, fallacia fundamenta præbere in probando crimine magiæ. Interim admittimus cum *Dn. Strykio de Jure sens. Diss. 7. Cap. 4. n. 14.* quod ejusmodi stigmata sive nævi, omnis tactus sint expertes, adeò, ut quamvis acus altè infigatur, nullus inde cruor fluat, tum demum suspectum reddere accusatum, si cum aliis indiciis sat gravibus concurrant. Quo tamen in casu bene monet *Ericus Mauritius Consil. chilon. 5. n. 3* ut carnifici inqvirenti in talia stigmata, vel scabini, vel notarius cum testibus adsint, diligenter observantes, ne quid fraudis à carnifice admittatur.

§. XVII.

Non probatur magia, si personæ ob magiam diffamatae, in tortura non possint lachrymas effundere. Placent quidem hæ nugæ *Bernbardo Zieritzio in comment. ad constit. crim. artic. 44.* quod miratur *Ericus Mauritius in dissert. de denunci. sagar. p. 63.* sed *Godelmannus de sagis lib. 3. Cap. 3. n. 26.* has omnes rejicit; hinc falsò allegatus est à *Berichio, p. 4. concl. 4. n. 60.* & à *Carpzov. Qv. 49. n. 63.* Et negandum non est, quod multæ personæ nullas lachrymas effundant in torminibus ex meris effectibus naturalibus. Nam ex mente Medicorum & Phisicorum illis lachrymæ sunt copiosiores, qui habent cerebrum humidum & illis sunt minores, qui habent magnam cerebri siccitatem, ut in cholericis & melancholicis. Nittuntur itaqve illi *Dd.* meliori fundamento, qui carentiam lachrymarum, nihil facere docent, ad probandum magiam.

magiam. *Vid. Del-Rio disquisit. magic. lib. 5. sect. 4. Oldekopp. observat. crim. tit. 4. Obs. 14.*

§. XVIII.

Magia non probatur, si mulieres tortæ omnem doloris sensum amittant. Sunt multi *Dd.* qui hanc indolentiam dicunt esse præternaturalem. Inde *Berlucius p. 4. Concl. 4. n. 166, & seqq.* Valde sollicitus est in fugerendis cautelis ad rumpendum hoc silentii arcanum. Enim verò hæc omnia (1) corruunt ex eo, si adducantur causæ naturales hujus soporis. Nam plerumque in numero prætensarum sagarum sunt anus deliræ, cerebelli turbati; quid mirum igitur, si illæ ob squalorem carceris, angorem animi, summos cruciatus, lassitudinem corporis, in extasin, quasi in profundum somnum incidant. Ex hac ratione damnamus morem nonnullorum carnificum, qui, antequam sagas tormentis imponunt, certam iis portionem contra hunc soporem hauriendam porrigunt. *Vid. Dn. Stryk. de Jur. sens. diff. 6. c. 4. n. 9.* deinde dæmon sua potentia efficere non potest, ut rei, tormentorum acerbitate victi, sua delicta non confiteantur. *Zaich. Quest. Medico. legales lib. 7. tit. 4. Qv. 2. n. 15.* Et (3) potest hæc somnolentia contingere, quando non magi; sed etiam fures vel homicidæ torquentur. *Vid. Stryk. d. Jur. sens. pag. m. 437. n. 17. & seqq.*

§. XIX.

Magia non probatur, quod diffamatae personæ habuerint parentes Magiæ convictos. Est quidem commune proverbium: *Der Apffel fällt nicht weit vom Stamme*; Verum illud non est universale. Et bene hanc opinionem refutarunt *Mantzius ad Artic. 144. Con-*

stit. crim. n. 34. & seqq. Del-Rio disquisit. mag. lib. 5. sect. 4. Vid. Bodin. disput. de fallac. indic. mag. pag. m. 35.

§. XX.

Diximus quidem in §. 7. quod crimen magiæ probetur, si damnum post minas illatum sit; sed hic asserimus, quod hoc modo non simpliciter probetur. Est quidem hoc indicium in *Constit. crim. Artic. 44.* fundatum; sed ritè debet intelligi. Nam damnum post minas illatum debet in continenti fieri. *Farinac. de indiciis & tort. lib. 1. tit. 5. Qv. sc. n. 14. Del-Rio lib. 5. sect. 3. (2)* requiritur, ut illæ minæ sint specificæ de eodem, quod sequitur, delicto. Nam, si sunt ambiguae, quæ possunt significare vindictam legalem, tunc non præbebunt sufficiens indicium. *Vid. Del-Rio disquisit. mag. lib. 5. sect. 4.* Et prætereà illæ minæ duobus minimum testibus probari debent. *Vid. Artic. 23. constit. crim. ibique Matth. Steph. in notis adde l. 9. C. d. test.*

§. XXI.

Magia non probatur per draconem volantem, & alicujus caminum petentem. Est enim hic volans draco nil aliud, quam materia sulphurea & nitrosa, conglobata & ardens, quæ propter celerem motum in aere vagatur, & à varia particularum textura & ab externa figura, modò ignis fatuus, modò draco volans vocatur. Et quando vulgus, qui causas hujus rei ignorat, fortè videt, talem draconem caminum alicujus petere, tunc putat, quod diabolus suis fociis res furto ablatas afferat. *Vid. Bodini disput. de fall. indic. mag. p. m. 37.*

§. XXII.

Magia non probatur per probam aquæ frigidaæ.
Susci-

Suscipiunt quidem hujus probæ patrociniū, *Crusius de indic. p. 2. c. 32. Et Jacobus, Rex Anglia in sua demonologia. lib. 3. c. 6.* Verū hoc patrociniū fati superstitiosum est, cum ex natura gravium corporum sufficientes rationes dari possint, ob quas hæc merguntur; & ex natura levium corporum, ob quas hæc supernatant. Hinc meritò hanc probam aquæ frigidæ tanquam rem superstitiosam rejiciunt. *Del-Rio disquisit. mag. lib. 4. Qv. 5. sect. 3. Jus. can. can. manna. c. 2. Qv. 5. c. 8. X. de purgat. Can. Godelm. de Sagis. lib. 3. c. 14. Heigius Qv. 39. n. 61. Vid. quoque Taboris opera Vol. 2. p. 416. §. 3. ubi probatio criminis magiæ per aquam frigidam rejicitur.*

§. XXIII.

Magia non probatur per fabulosas sagarum denunciationes, stulta & impossibilia interdum continentes; siquidem ejusmodi denunciationes planè damnentur, per *Can. 12.* (qui tamen canon pro suppositio habetur. *Vid. Tab. Vol. 2. pag. m. 515. c. 26. Qv. 5. c. 18. Caus. 2. Qv. 1.* Nec unius sagæ denunciatio habilitatur per alterius sagæ denunciationem; imprimis, si non certam & verosimilem denunciationis & scientiæ causam (sine qua aliàs in criminalibus testi nihil creditur per *l. 13. & 14. in fin. ff. d. interrogat. action. l. ob. carmen §. 1. ff. d. test. Cap. quia verosimile X. de presumpt.*) sed fallacem erroneam & dubitativam reddant. *Vid. Godelm. in tr. de sagis. lib. 2. c. 4. Gilb. in arbor. sua crim. Cap. 2. tit. 17. n. 14. Tabor Vol. 2. pag. m. 372.*

§. XXIV.

Non probatur magia per confessiones sagarum, quod fuerint cum aliis, in choreis; siquidem choreæ lamiarum

miarum à multis viris doctis pro imaginarius & elu-
sionibus Satanicis hebeantur *Alciat. lib. 8. parerg. Cap.*
22. Cothm. lib. 1. conf. 12. n. 229. n. 263. Klock. lib. 3. conf.
195. n. 41. & seqq. c. 12. conf. 26. qv. 5. qvamvis Klock. lib.
3. conf. 195. n. 119. & seqq. & Tabor vol. 2. pag. 459. pag.
503. & 504. 527. tradant, qvòd non omnes choreæ
imaginariæ sint; cum & experientia veritatem ea-
rum condocet apud Remig. lib. 1. de demonolatr. c. 14.
24. & 29. itemqve lib. 3. c. 12. Et multis rationibus
atqve authoritatibus illam comprobat Bensfeld p. 1.
de confess. magor. concl. 12. 13. fol. 250. & seqq. Etenim
Satanas, non quidem miracula; sed mira tamen at-
qve mirabilia permittente DEO efficere possit. Vid.
Tabor. Vol. 2. pag. m. 410. Amiserunt enim dæmones
tantum dona gratiæ, manserunt autem integri in po-
tentia naturali, si Bensfeldio & Del-Rioni in conf. 195. n.
122. apud Klock. vol. 3. credere velimus. Vide tamen ex
nostris, Ecclesia Evangelica Theologum celeberrimum, Dn. Ca-
lovium, in system. loc. Theolog. tomo. 4. pag. 328. vers. qvoad
potentiam. Ubi dicit qvòd diabolus potentiæ divinæ
& potentiæ bonorum angelorum cedere debeat, qvam
sententiam & nostram facimus. Quinimo, qvia dia-
bolo non impossibile fuit, creatorem cœli & terræ
in pinnaculum templi, & super montem portare,
ideo nec ipsi impossibile est lamias ad has choreas
verè & realiter & non imaginariò deferre. Vid. Tract.
tomo XI. part. 2. pag. 353. n. 40. & seqq. & ex Stryck. d.
Jur. sens. in prohem. n. 61. & seqq. pag. m. 20. 21.

§. XXV.

Magia non probatur, quando aliquis vendit animal cum
pollici-

pollicitatione futuræ felicitatis, cum illud animal possit esse naturale. *Vid. Stryk. de Jure sens. in procem. n. 68. 69. pag. m. 23. & 24.*

§. XXVI.

Magia non probatur, quando saga de alia saga confitetur; quia confitens saga non potest rationem sui dicti reddere ex sensu corporeo; rationis ratio hæc est. Si testi honesto, nulla delictorum macula contaminato, & de alio deponenti, nulla fides habetur, nisi dicti sui rationem reddat ex sensu corporeo, per l. 20. §. pen. ff. qui testam. facere poss. Carpzov. Qu. 121. n. 17. Zanger. d. question. & tort. c. 2. n. 20. multo minus sagæ, de innocente femina confitenti fidem habemus. Deinde saga est persona infamis, cui tanquam infami testi non creditur. l. 3. §. 5. & l. 20. ff. d. test. adeo, ut Judex testem infamem ex officio repellere teneatur. *Mascardus de probat. vol. 3. concl. 1356. n. 11. & seq. Nicol. Everh. de test. & attest. Cap. 2. membr. 1. n. 259. & seqq. Vid. quoque §. 10. supra.*

§. XXVII.

Sed magia à quibusdam pro probata habetur, quando lamia confitentur, quod satanas cum ipsis actum venereum verè exercuerit; ex quo tamen vero Satana cum lamiis coitu, vera proles humana non potest nasci. *Vid. disput. D. Kleinii Anno 1698. die 19. Nov. Rostochii habitam, de lamiarum nefando cum Satana coitu.* Quando autem dicimus, quod cum lamiis diabolus verum concubitum habere possit, tunc illum intelligimus quoad actum coeundi, & in oppositione ad illusorium & imaginarium concubitum, non verò quoad effectum generandi veram sobolem humanam: *Vid. d. disp. n. 7. Cap. 1.* Potest enim diabolus adscititio corpore lamiis incubare, & quoad coeundi actum proci concumbentis officio actualiter defungi. *ibid. n. 9.* quam communem Theologorum, Juristarum, & saniorum Philosophorum sententiam esse, volunt. *ibid. n. 10.* Quod autem ex tali coitu vera proles humana non nascatur, hoc inde probatur, quia ex constanti

stanti Medicorum asserto, semen illud verile, quod vel minimā
horā extra testiculos vel uterum divertitur, statim omnem vim
genitalem amittit, evanescente è vestigio calore, extinctōque
geniali spiritu. *Vid. d. diss. cap. 2. n. 41.* Jam verò diabolus,
qui ipsemet nullum semen habet, abutitur in execrando hoc con-
gressu, tali semine, quod fortean nocturnis pollutionibus ejacu-
latum exceptit, ergo ex tali coitu non potest vera proles humana
nasci. *Vid. d. diss. cap. 2. n. 37. & seqq.* cui accedit quod sensus
frigiditytis, quam in semine à diabolo lamiis immisso, hæ sentiunt,
argumento sit, semen hoc non esse prolificum. *ibid. n. 62.* Et
hæc sufficiant de probatione criminis magiæ. Si quæ inveni-
antur in hac disputatione minus rectè posita & decisa, illa bene-
volus lector in mitiorem partem interpretetur; quod si ex
aliis rationibus alicujus Autoris sententiam reprobaverim, mihi
hoc nemo vitio vertet, cum nihil fermè frequentius sit in inda-
ganda veritate quàm interdum discedere à sententia alicujus pro-
bati autoris & nostram tueri; modò id fiat modestè, & sine fa-
mæ læsione. Id quod cum me observasse putem, faci-
lem assensum in reliquis me meritum esse,
confido.

